

青州府志卷三十五

傳一之二

名宦傳二

宋

楊美并州文水人本名光美避太宗舊名改焉美狀貌雄偉武力絕人以豪俠自任建隆三年升青州北海縣為軍以美為軍使為政尚簡易民皆德之乾德二年召還北海民數百詣闕乞留詔諭之不去答為首者始罷

宋史本傳

馬仁瑀大名夏津人太祖時為密州防禦使太祖征晉陽命仁瑀率師巡邊至上谷漁陽契丹素聞仁瑀名不敢出

青州府志卷三十五

一

駕還仁瑀歸治所明年羣盜起兗州賊首周弼毛襲甚勇悍材貌奇偉弼號曰長腳龍監軍討捕數不利詔仁瑀掩擊仁瑀率帳下十餘卒入泰山擒弼盡獲其黨魯郊遂寧

宋史本傳

李林京兆離狐人太祖時為千乘令明習法律決斷如流

百姓稱為神君

縣志又見山東通志

趙昌言字仲謨汾州孝義人太宗時知青州入拜職方員外郎昌言強力尚氣槩當官無所顧避所至以威斷立名

宋史本傳

寇準字平仲華州下邳人也太宗時拜左諫議大夫樞密

副使改同知院事罷知青州帝顧準厚旣行念之常不樂語左右曰寇準在青州樂乎對曰準得善藩當不苦也數日輒復問左右揣帝意且復召用準因對曰陛下思準不少忘聞準日縱酒未知亦念陛下乎帝默然明年召拜參

知政事

宋史本傳

凌策字子奇宣州涇人雍熙二年舉進士淳化間知青州

東封以供億之勤超拜都官郎中

宋史本傳

趙賀字餘慶開封封邱人舉毛詩及第補臨朐縣主簿賀有幹才知州寇準具知賀淳化中調丁壯塞澶州決河眾多逸去獨賀全所部而歸臨朐父老張樂迎賀準使由譙

青州府志卷三十五

二

門過曰旌賀之能也

宋史本傳

樂崇吉字世昌開封封邱人少爲吏部令史上書言事調補臨淄主簿會令坐贓貶卽命崇吉代之崇吉明習文法清白勤事至道初擢度支員外郎度支副使

宋史本傳

張揆字文裕齊州歷城人幼篤孝舉進士知益都縣當督賦租置里胥弗用而民皆以時入石介獻息民論請以益

都爲天下法

宋史本傳

張齊賢以兵部尚書知青州六年其治安靜民頗安之好事者或謗其居官弛慢朝廷召還或語人曰向作宰相幸無大過今典一郡乃招物議正如監御厨三十年臨老反

賁粥不了士大夫聞之深罪謗者

以澠水燕談錄修

案齊賢宋史有傳無青州事故本此立傳然本傳言

景德初起爲兵部尚書知青州上幸澶淵命兼青淄

濰州安撫使二年改吏部尚書而澠水燕談錄謂以

吏部知青州誤故正之

戚綸字仲言應天楚邱人大中祥符八年知青州歲饑發

公廩以救餓殍

安甚眾徙鄆州

宋史本傳

李士衡字天鈞秦州成紀人眞宗時盜起淄青間遷刑部

侍郎知青州前守捕羣盜妻子寘棘圍中士衡至悉縱罷

之使去未幾其徒有梟賊首至者

宋史本傳

青州府志卷三十五

三

王博文字仲明曹州濟陰人眞宗時出知海州徙密州負

海有鹽場歲饑民多盜鬻吏捕之輒抵死博文請弛鹽禁

候歲豐乃復從之

宋史本傳

胡順之字孝先原州臨涇人登進士第爲青州從事高麗

入貢中貴人挾以爲重使州官旅拜於郊順之曰青大鎮

也在唐押新羅渤海柰何卑屈如此獨不拜大姓麻士瑤

陰結貴侍匿兵械服用擬尙方親黨僕使甚多州縣被陵

蔑莫敢發其姦會士瑤殺兄子温裕其母訴於州眾相視

日孰敢往捕者順之持檄徑去盡得其黨有詔鞫問士瑤

論死其子弟坐流放者百餘人

宋史本傳

曹瑋字寶臣彬子乾興初知青州徙天雄軍卒謚武穆

宋史

本傳

李迪字復古其先趙郡人後徙幽州又徙家濮迪深厚有器局舉進士第一仁宗即位歷江寧府兗州青州久之除彰信軍節度使知天雄軍徙青州

宋史本傳

范諷字補之齊州人舉進士第擢天章閣待制知審刑院出知青州再遷戶部郎中時山東饑宰相王曾青人家積粟多諷發取數千斛濟飢民因請遣使安撫京東入為右諫議大夫權御史中丞又請益漕江淮米百萬自河陽河陰東下以振貸之

宋史本傳

青州府志卷三十五

四

郝仁禹景祐初青州兵馬都監知田事請命規度水利募民耕懇從之是秋詔曰仍歲饑歉民多失職今秋稼甫登方事斂穫州縣毋或追擾以妨農時刑獄須證逮者速決

之

以宋史食貨志農田篇修

龐籍字醇之單州武成人及進士第景祐四年為觀文殿大學士戶部侍郎知青州遷尚書左丞不拜徙定州治民

頗有惠愛

宋史本傳

富弼字彥國河南人慶歷四年以資政殿學士出知鄆州歲餘加給事中移青州兼京東路安撫使河朔大水民流就食弼勸所部民出粟益以官廩得公私廬舍十餘萬區

散處其人以便薪水官吏自前資待缺寄居者皆賦以祿使卽民所聚選老弱病瘠者廩之仍書其勞約他日爲奏請受賞率五日輒遣人持酒肉飯糗慰藉出於至誠人人爲盡力山林陂澤之利可資以生者聽流民擅取死者爲大冢葬之目曰叢冢明年麥大熟民各以遠近受糧歸凡活五十餘萬人募爲兵者萬計帝聞之遣使褒勞拜禮部侍郎弼曰此守臣職也辭不受前此救災者皆聚民城郭中爲粥食之烝爲疾疫反相蹈藉或待哺數日不得粥而仆名爲救之而實殺之自弼立法簡便周盡天下傳以爲式王則叛齊州禁兵欲應之或詣弼告齊非弼所部恐事

青州府志卷三十五

五

泄變生適中貴人張從訓銜命至青弼度其可用密付以事使馳至齊發吏卒取之無得脫者卽自劾顛擅之罪帝益嘉之以爲禮部侍郎又辭不受

宋史本傳

田瑜字資忠河南壽安人舉進士慶曆中除龍圖閣直學士知青州城中有殺人投屍井中者吏以其無主名不以聞瑜廉得之大出金帛購賊後數日鄰州民執賊以告屬歲凶多盜瑜立賞罰設方畧捕格之境中肅然

宋史本傳

士存字正仲潤州丹陽人慶曆六年登進士第除密州推

官修潔自重爲歐陽修呂公著趙槩所知

宋史本傳

蔡齊字子思其先洛陽人曾祖綰爲萊州膠水令因家焉

舉進士第一儀狀雄偉舉止端重眞宗見之顧謂宰相寇準曰得人矣仁宗時知河南府以親老改密州歲旱除公田租數千石請弛鹽禁使民得衣食救饑蘇軾亟稱之

宋以

史本傳及諸城縣志修

程琳字天球永寧軍博野人景祐在政事小人僥倖皆不便以事中之坐貶光祿卿知潁州已而上思之徙知青州

以歐陽文忠公集贈中書令程公神道碑及墓志銘修

趙槩字叔平南京虞城人中進士第仁宗時加直集賢院知青州坐失舉澠池令張誥免久乃起監密州酒知滁州山東有寇李二過境上告人曰我東人也公嘗爲青州民

青州府志卷三十五

六

愛之如父母我不忍犯率眾去

宋史本傳

范仲淹字希文其先邠州人後徙家江南遂爲蘇州吳縣人舉進士第仁宗末請罷政事出知鄧州徙杭州再徙青州有惠政陽溪側出醴泉仲淹構亭泉上民感其德以范公目之

以宋史本傳及齊乘修

龔鼎臣子輔之鄆州須城人景祐元年第進士知安邱縣以賢良方正召試密閣轉太常博士神宗卽位拜諫議大夫京東東路安撫使知青州改太中大夫尋以正議大夫

致仕

宋史本傳

吳奎字長文濰州北海人皇祐中出知密州神宗初立以

資政殿大學士知青州司馬光諫曰奎名望清重今爲陶
紕奎恐大臣皆不自安各求引去階下新卽位於四方觀
聽非宜帝乃召奎歸中書及琦罷相竟出知青州明年薨

宋史
本傳

歐陽修字永叔廬陵人舉進士試南宮第一擢甲科神宗
卽位遷兵部尙書知青州改宣徽南院使判太原府辭不
拜徙蔡州修以風節自持旣數被汙巖年六十卽連乞謝
事帝輒優詔弗許及守青州又以請止散青苗錢爲安石
所詆故求歸愈切凡厯數郡不見治迹不求聲譽寬簡而
不擾故所至民便之或問爲政寬簡而事不弛廢何也曰

青州府志卷三十五

七

以縱爲寬以略爲簡則政事弛廢而民受其弊吾所謂寬
者不爲苛急簡者不爲繁碎耳

宋史
本傳

趙抃字閱道衢州西安人進士及第神宗時拜資政殿學
士知杭州改青州時京東旱蝗青獨多麥蝗來及境遇風

退盡墮水死

宋史
本傳

張方平字安道南京人舉茂才異等神宗卽位王安石行
新法方平陛辭極論其害帝憮然召爲宣徽北院使留京

師王安石深沮之以爲青州

宋史
本傳

鄭獬字毅夫安州安陸人神宗初知杭州未幾徙青州方
散青苗錢獬言但見其害不忍民無罪而陷憲綱引疾乞

閑提舉鴻慶宮

宋史本傳

滕元發初名甫字元發以避高魯王諱改字爲名而字達道東陽人熙甯三年歷青州哲宗卽位除爲龍圖閣直學士先是富弼守青州嘗置教閱馬步軍九指揮弼旣去軍稍闕不補元發至青復完之溢額數千其後朝廷屢發諸路兵或喪失不還惟青州兵歷久猶盛其責守城池皆以靜洽聞飲酒賦詩未嘗爲遷謫意

以宋史本傳及薛應旂宋元通鑑修

蘇軾字子瞻眉州山人嘉祐二年舉進士第二人熙甯七年自杭州通判徙知密州時方行手實法使民自疏財產以定戶等又使人得告其不實司農寺又下諸路不時

青州府志卷三十五

八

施行者以違制論軾謂提舉常平官曰違制之坐若自朝廷誰敢不從今出於司農是擅造律也若何使者驚曰公姑徐之因上宰相韓絳書首論蝗灾當蠲秋稅或倚閣青苗錢又極論手實之酷絳在政府莫之行也而手實卒罷民賴以少安又論京東河北榷鹽之害並論河北京東盜賦狀州俗號武悍特好強劫加以比歲薦饑椎剽之姦殆無虛日軾明立構賞隨獲隨給人用競勸盜亦斂迹安撫司遣三班使臣捕逸盜入境卒凶暴恣行以禁物誣民入其家爭鬪至殺人畏罪驚潰將爲亂民奔訴軾軾投其書不視曰必不至此散卒聞之少安徐使人招出戮之又以

三司使章惇建言乞權河北京東鹽議已成而惇罷軾乃上文侍中彥博書乞其救止凡在密州所言皆禍福安危所繫不可以在朝在外異也九年正月在密州遷祠部員外郎十一月以祠部員外郎直史館移知河中府尋移知徐州

以宋史本傳及本集年譜墓志修

趙庾亡其世貫初知眉州丹稜縣與蘇軾遊軾至密未一年庾以尚書郎來爲通判與軾數相倡和軾嘗爲作通判廳題名記稱其勤於吏職視官事如家事又有和趙郎中捕蝗見寄詩及趙郎中往莒縣逾月而歸詩亦以捕蝗往也其勤於吏職可知已

以蘇文忠公集修

青州府志卷三十五

九

案蘇軾於熙七年十一月三日到密州任八年成伯來倅於此倡和之作集中疊見及軾密州受代尚有留別釋伽院牡丹呈趙倅詩且通判廳記作於移徐州後而成伯刻之廳壁者是軾去而成伯猶在密也又考密州常山雩泉記作於九年四月其碑雖亡有元劉澄摹刻之石至今尚存其碑陰書名前書諸城縣尉丞令密州觀察推官安化軍節度推官後書朝奉郎守尚書屯田郎中通判密州軍事上騎都尉賜緋魚袋趙庾末書朝奉郎尚書祠部員外郎直史館知密州軍事騎都尉蘇軾以時考之成伯而外不

能別置一人於此則庾卽成伯也故傳直書曰趙庾云

孔宗翰字周翰孔子四十六代孫也知密州與蘇軾爲代軾詩朱輪未及郊清風已先馳又有今年太守尤難繼慈愛聰明惠利人其見稱於軾如此

以宋史孔道輔傳及蘇文忠公詩集修

案宋史孔道輔傳道輔孔子四十五代孫宗翰道輔子故以四十六代爲斷蘇文忠集自註和孔君亮郎中見贈詩云君亮四十八世君亮宗翰兄則宗翰亦四十八世也俟再考

竇舜卿字希元相州安陽人爲淄青路都監海盜行劫執

青州府志卷三十五

十

博昌鎮官吏肆剽掠舜卿募士三百悉擒之

宋史本傳

陳次升字當時興化仙遊人第進士知安邱縣轉運使吳居厚以聚斂進檄尉罔征稅於遠郊得農家敗絮捕送縣次升縱遣之居厚怒將被以文法會御史中丞黃履薦爲

監察御史

宋史本傳

劉摯字莘老永靜東光人擢甲科元祐中自大名徙知青

州

宋史本傳

李敬紹聖五年令臨朐以學校爲首務舊學在城西南隅湫隘已甚敬徙於羊石街卽今地也

縣志

翟汝文字公巽潤州丹陽人登進士第徽宗時爲吏部侍

郎出知廬州徙密州密負海產鹽蔡京屢變鹽法盜販者眾有司窮治黨與汝文曰祖宗法度獲私商不詰所由欲靖民也今繫而虐之將爲厲矣悉縱之密歲貢牛黃汝文曰牛失黃輒死非所以惠農宜輸財市之則其害不私於

密上從之

宋史本傳

毛注字聖可衢州西安人舉進士知高苑縣以治辦稱

宋史

本傳

黃鐸江南人崇甯間知千乘縣事建學宮規制悉備邑之有學自鐸始故士人至今重之

以博興縣文廟碑修

李邈字彥思臨江軍清江人拜青州觀察使仍知府事邈

青州府志卷三十五

十一

始視事兵不滿二千錢不滿二百萬自度無以拒敵乃諭民出財共爲死守民恃邈爲固不數日得錢十三萬貫粟十一萬石募民爲勇敢以數千人而新集之兵皆無鬪志金人至邈乞師於宣撫副使劉韜且問道走蠟書上聞皆不報城被圍且戰且守相持四旬城破邈巷戰不克將赴井左右持之不得入斡離不脅邈拜不拜以火燎其鬚眉及兩髀亦不顧乃拘於燕山府金人問曰集民兵擊我謂我爲賦何也邈曰汝負盟所至掠吾金帛子女何諱吾言敵不能屈久之欲以邈知滄州笑而不答且說之曰天下強弱之勢安有常特吾中國適逢其隙耳汝不以此時歸

二帝及兩河地歲取重幣如契丹以爲常利強尙可恃乎
金人諱其言命邈披髮左衽邈憤詆甚力金人撻其口
猶吮血暎之翼日自去髮爲浮屠金人大怒遂遇害將死
顏色不變南向再拜端坐就戮燕人爲之流涕高宗贈招

化軍節度使謚曰忠壯

宋史忠義本傳

曾孝序字逢原泉州晉江人遷龍圖閣直學士知青州繕
修城池訓練士卒儲峙金穀有數年之備金人不敢犯高
宗卽位遷徽猷閣學士升延康殿學士召赴行在旣而青
州民詣南都借留許之先是臨朐士兵趙晟聚眾爲亂孝
序付將官王定兵千人捕之失利而歸孝序責以力戰自

青州府志卷三十五

十二

贖定乃以言撼敗卒奪門斬關入孝序出據廳事瞋目罵
之遂與其子宣教郎訐皆遇害年七十九城無主遂陷知
臨淄縣陸有常率民兵拒守死於陣知益都縣張侃千乘
縣丞丁興宗亦死之後贈孝序五官爲光祿大夫謚威愍
于訐承議郎有常朝散郎錄其家一人贈侃興宗二官官

二子

宋史忠義本傳

耿峻好學通六經初授高密尉廉幹有聲再任昌樂決獄
治賦吏民感悅卒贈洗馬

縣志

右傳舊志宋有劉熙古曹彬韓億孔道輔余靖宋史
本傳無青州事有張敦禮劉庭式宋史本傳無密州

事不能立篇有劉偁知博興縣見澠水燕談錄無博
興事有黃庶唐彥猷庶青州從事有青社伐檀集餘
無可見彥猷青州守亦見澠水燕談錄記其琢紅絲
石爲硯不及民事當入雜記又有曾布布見宋史姦
臣傳以龍圖閣學士知太原府歷眞定河陽及青瀛
二州舊志竄入民甚德之一語列之名宦不敢從若
宋知青州有十三賢曰寇準曰曹瑋曰李迪曰龐籍
曰富弼曰程琳曰范仲淹曰趙槩曰吳奎曰歐陽修
曰趙抃曰張方平曰劉摯青人建祠祀之久矣宋史
皆有傳而瑋迪仲淹摯皆不詳知青州事琳則並知

青州府志卷三十五

十三

青州而無之然歐陽文忠公集程公神道碑及墓志
銘皆言知青州蓋史佚之也記曰有功德於民則祀
之况卓卓如范公者乎故正史雖不能據以立篇亦
必爲傳以存其槩不可以劉熙古曹彬韓億孔道輔
余靖例也

金

郭建義州宏政人天會間爲益都令廉明穎異吏民畏服

累遷濰州判官

鍾志

高通皇統十九年爲高苑令時漯水自華不住山東北入
大清河僞齊劉豫迺導之東行爲小清河運鹽初行高苑

北地卑患水通改田縣南長沙溝又壘土爲隄捍城民不告勞迄今猶懷其惠

舊志縣志又見山東通志

齊乘小清河爲運鹽河初行高苑縣北金皇統間縣令高通改由縣南長沙溝然此水紆曲上流岐淺鹽舟多梗議者欲引孝婦水西注上流非計也蓋小清舟不過欲達大清耳若自博興引渠至蒲臺立堰平原僅五十里徑達大清矣

張承奉大定九年領昌樂縣事政務修舉民情和樂

縣志

吳德彰大定間臨朐主簿益都旁邑飛蝗爲灾獨不入境遇旱步禱輒雨屢致豐年民歸其德立祠祀之

舊志又見山東通志

青州府志卷三十五

十四

木甲良弼泰和間爲益都令惠愛及民民思戴之

縣志

完顏懷德字輔之以宗子衛紹王至寧元年選臨淄令有三善政不事苛細不喜榜掠深文不好宴樂吏民便之

以元

遺山集修

布薩安貞本名阿哈

原作阿海

貞祐初除山東路統軍安撫等

使初益都縣人楊安國自少無賴以鬻鞍材爲業市人呼爲楊鞍兒遂自名楊安兒泰和伐宋山東無賴往往相聚剽掠詔州郡招捕之安兒降隸諸軍累官刺史防禦使大安三年招鐵瓦敢戰軍得千餘人以唐古哈達爲都統安兒爲副統戍邊至雞鳴山不進安兒乃亡歸山東與張汝

楫聚黨攻劫州縣殺畧官史山東大擾安貞至益都敗安兒於城東安兒奔萊陽萊州徐汝賢以城降安兒賊勢復振登州刺史耿格開門納僞鄒都統以州印付之郊迎安兒發帑藏以勞賊安兒遂僭號置宮屬改元天順凡符印詔表儀式皆格草定遂陷甯海攻濰州僞元帥郭方三據密州畧沂海李全畧臨朐扼穆陵關欲取益都安貞以沂州防禦使布薩瑠嘉爲左翼安化軍節度使完顏額琳爲右翼七月庚辰安貞軍昌邑東徐汝賢等以三州之眾十萬來拒戰自午抵暮轉戰三十里殺賊數萬獲器械不可

勝計金史本傳

青州府志卷三十五

十五

完顏霆本姓李氏中都寶坻人粗知書善騎射輕財好施得鄉曲之譽貞祐初遙授同知益都府事知宣差都提控遷棣州防禦使賜姓完顏氏興定二年宋高太尉兵二萬駐朐山霆軍乏糧采野菜麥苗雜食之宋兵柵朐山下隔湖港霆作港中暗橋遣萬戶胡仲珪副統劉贊率死士由暗橋登山霆率兵四千人趨山下約以昏時舉火爲期上下夾擊宋兵大敗墜澗泥水死者不可勝計斬高太尉彭元帥於陣餘眾潰去遷安化軍節度使經畧副使如故

金史

本傳

伊喇古泥

原作移刺古與涅

安化軍節度使貞祐初大元兵取密

州古 率兵力戰流矢連中其頸既拔去復中其頰死焉

貞祐三年詔贈安遠大將軍知益都府事

金史忠義本傳

完顏寓本名恩楚

原作訛出

西南路明安人大定二十八年進

士貞祐初遷禮部侍郎改東京副留守隴州防禦使遷安

化軍節度使兼山東路統軍副使興定元年四月詔寓以

本官權元帥左都監行元帥府事和輯苗道潤伊喇特爾

格軍事語在道潤傳十二月密州破寓爲亂軍所殺

金史本傳

蒙古綱本名呼爾根

原作胡里綱

咸平府明安人承安五年進

士貞祐三年權山東宣撫副使改山東路統軍使兼知益

都府事興定三年益都桃林寨總領張林號張大刀據險

青州府志卷三十五

十六

爲亂自稱安化軍節度使綱奏林勢甚張乞遣河南馬軍

千人單州經畧司以眾接應左司郎中李蹊請令綱約燕

寧同力殄滅單州經畧使完顏仲元分兵三千人同往宰

相以糧運不給益都以東嘯聚不止一張林宜令綱設備

禦俟來春議之四年張林侵掠東平綱遣元帥右監軍行

樞密院事王庭玉討之殺數千人生擒張林招降虎窟諸

寨悉令歸業詔賜空名宣敕聽綱第功遷賞張林乞貰死

自效請曰臣兄演在宋爲統制有眾三千駐卽墨萊陽之

境請以書招之使轉致諸賊之歟密者相爲表裏然後以

檄招益都張林不從則合擊之山東不足平也所謂益都

張林卽據府事逐田琢者也事見琢傳綱以林策請於朝
樞密院請羈縻使之制可以爲萊州兵馬鈐轄久之山東
不能守林乃降於宋云

金史本傳

田琢字器之蔚州定安人中明昌五年進士興定元年朝
廷易置諸將遷山東西路轉運使二年改山東東路轉運
使權知益都府事行六部尙書宣差便宜招撫使李旺據
膠西琢遣益都治中張林討之生擒李旺李全據安邱琢
遣總領提控王政王庭玉討之宣差提控太府少監伯特
完率政兵攻安邱敗焉提控王顯死之旣而昌樂縣令珠

格罕都

原作術
虎桓都

臨朐縣令烏雅烏登

元作兀
顏吾丁

福山縣令烏

青州府志卷三十五

十七

凌阿實嘉努壽光縣巡檢赫舍哩綽哈破李全於日照縣
琢承制各遷官一階進職一等詔許之初張林本益都府
卒有復立府事之功遂爲治中而凶險不逞恥出琢下琢
在山東徵求過當頗失眾心林欲因眾以去琢未有間也
會于海牟佐據萊州琢遣林分兵討之林旣得兵伺琢出
卽率眾譟入府中琢倉猝入營領兵與林戰不勝欲就外
縣兵且戰且行至章邱兵變求救於鄰道不時至東平行
省蒙古綱以狀聞宣宗度不能致林而欲馴致之乃遣人

召琢還

金史本傳

張亞夫猗氏主簿嘗權行部官主餉密州委曲購得糧二

萬斛兵儲乃足行至高密徵州兵拒李全詔遷密州觀

察判官

金史附
田琢傳

完顏君佐益都尉盜息民安時人稱之

舊志
縣志

元

薩奇蘇

原作
吉思

回鶻人世祖卽位授山東行省都督遷經

畧統軍二使兼益都路達嚕噶齊辭不拜上言山東重鎮
宜選貴戚臨之帝不許賜京城宅一區益都田千頃及壇
馬羣園林水磴海青銀鼠裘之屬兵後民乏牛具爲之上
聞驗民丁力宮給之統軍超布哈田遊無度害稼病民元
帥伊蘇岱爾據民田爲牧地薩奇蘇隨事表聞有旨杖超

青州府志卷三十五

十八

布哈一百令伊蘇岱爾還其田壇故將毛璋欲率諸部謀
執薩奇蘇以歸宋璋黨上變乃襲璋斬之薩奇蘇嘗慕古
人舉親舉讐之義叛帥故卒得與子姓參用公論多之山
東歲屢歉爲請於朝發粟振卹又奏蠲其田租山東人刻
石頌德

元史
本傳

王盤字文炳廣平永年人年二十六擢正大四年經義進
士中統元年卽拜益都等路宣撫副使居頃之以疾免李
壇素重盤以禮延致之盤亦樂青州風土乃買田瀾河之
上題其居曰鹿菴有終焉之意及壇謀不軌盤覺之脱身
至濟南得驛馬馳去入京師因侍臣以聞世祖卽曰召見

拜翰林直學士同修國史

元史本傳

董文炳字彥明真定藁城人爲山東東路經畧使率親軍以行出金銀符五十有功者聽與之閏九月文炳至益都留兵於外從數騎衣冠而入居府不設警衛召瓊故將吏立之庭曰瓊狂賊誑誤汝等瓊已誅死汝皆爲王民天子至仁聖遣經畧使撫汝當相安毋懼經畧使得便宜除擬將吏汝等勉取金銀符經畧使不敢格上命不予有功者

所部大悅山東以安

元史本傳

段綺一作琦字百祥濱州人中統二年領北海縣事撫字有

方民皆安業職滿民乞留加明威將軍仍知北海縣事

縣志

青州府志卷三十五

十九

昌樂縣志云知昌樂案元史地理志昌樂爲北海正之

司仲可中統間爲臨淄尹闢田野興學校均賦役盜賊止

息囹圄空虛時廉訪使表仲可善政第一

縣志又見山東通志

陳仲祥中統間爲臨朐尹操守廉潔布政和平每遇歲凶

鄰境流移之民皆令布居山岡時加振卹每出羣遮道而

拜仲祥察其疾苦隨地處分且勸慰之吾欲若輩盡山澤

之利以便自給也人皆感激稱樂土焉

縣志又見山東通志

翟子英中統間爲臨朐尹廉潔謹慎才敏而練公餘輒杜

門端坐手不釋卷聲色一無所好

山東通志

綦泰字伯亨樂安人父公直爲輔國大將軍都元帥至元十三年出征海西廷奏乞以子泰爲本邑官代養其父帝許之乃以泰爲樂安尹仍終身無徙他職泰公廉惠愛情法兩全凡一切修舉工役必期堅久而悉出已資以是鄉人愛之祀名宦更別祀於信公祠

縣志

來阿巴齊

原作來阿巴赤

寧夏人至元十八年佩三珠虎符授通

奉大夫益都等路宣慰使都元帥發兵萬人開運河阿巴齊往來督視寒暑不輟有兩卒自傷其手以示不可用阿巴齊檄樞密并行省奏聞斬之以懲不律運河旣開遷膠萊海道漕運使

元史本傳

青州府志卷三十五

二十

張崇道大名人

一作銅臺人

至元二十一年知密州崇學校重

農桑有古循吏風

舊志縣志

孔治孔子五十三世孫至元二十九年知密州甫下車卽捐俸修儒學公餘躬親督視不少懈並於學旁置師生講肄之所別擇士之秀者延師教之治化大興性廉潔絕私謁惟以戢姦卹因爲事父老感悅攜杖焚香拜於庭者無

虛月

舊志縣志

卜元英字彥才燕人大德五年知密州廉能公慎始終如一先是儒學兩廡從祀諸賢皆以繪畫元英始肖像易之太常博士李之紹爲文紀之其畧云奉訓卜侯庀徒蒞事

代繪以臻然後延聘師儒擇子弟秀民而教育之蠲其雜徭鄉邑增勸生徒雲集絃誦之聲殆若鄒魯之盛焉

志縣

樂汝翼大德間知博興州持已廉潔勤於撫字興學敷教民多化之

舊志縣志又見山東通志

田恭兗州人大德間以寧海判官遷安邱尹修舉廢墮勤

卹民隱尤加意於農桑學校士民愛服

志縣

葛讓字敬甫至大初為高苑令歲大饑首捐俸以為眾勸

更多方移請設法振舖民賴全活者千數

志縣

楊溫為高苑尹至大元年大侵倡儀與監縣公買住主簿

楊汝梅議率公吏人等首捐俸米以為眾勸全活者數千

青州府志卷三十五

二十一

人士論偉之

志縣

李善卿至治間為臨朐尹修學校決疑獄持已廉平勤於

撫字民信愛之

志縣

郭充文宗時知博興州

一作監州

表賢行尊碩德政興廢舉賦

役均平士民多畏服之

志縣

張德新字仲勉濱州蒲臺人至順間為樂安尹廉能剛斷

惠卹士民及沒民祀之於信公祠併纂公稱三尹祠今祀

名宦

志縣

楊仲徽

鍾志作楊徽

長清人元統元年尹北海首以興學育才

為務莅政和平獄訟清簡民甚便之

舊志縣志

温都爾原作

字瑞之喀喇原作

氏元統二年除益都路

總管俗頗悍黠而温都爾務興學校以平易治之有上馬

賊白晝劫人久不能捕温都爾生擒之其黨賂宣慰使羅

卜和原作

誣以枉勘縱其賊已而賊劫河間復被獲乃盡

輸其情而温都爾之誣始白俾再任一考親王邁努鎮益

都其府屬病民温都爾裁抑之民以無擾元史良吏本傳

許輔字良佐臨邑人順宗至元元年授益都路總管受詔

勤王沒於陣古今圖書集成

真閭順宗至元四年任密州達嚕噶齊惓惓以厚風俗興

文教爲己任勉厲屬縣廣立社學擇通曉經書者爲之師

青州府志卷三十五

二十二

常親至閭閻召耆老問民疾苦勸農課桑務期實效時山

海間盜賊竊發爲嚴更鼓之制督捕盜官兵設方畧定功

賞姦人屏息民賴以安堵州廨歲久傾圮首損俸以倡僚

屬凡材木瓦石工役必授其直不以累民並修超然臺及

各官廨舍秩滿不俟代而去州人思之乃述其善政勒石

於州治之門右焉舊志縣志

范元澤東平人順宗至元間爲益都路總管政著能聲民

懷其德舊志

李伯豪商河人由進士出身尹壽光爬梳積滯拯困扶危

闢土田決疑獄數載之間民安田野去之日邑人爲之立

祠勒去思碑以表之

縣志

楊公獻縣人至正五年知安邱有雋才興利除害愛民如

子

舊志
縣志

黃濟字汝舟河南祥符人至正八年知密州值歲饑盜起濟陳弭盜救荒各十事稟弛漢人不得持兵器禁乞減價糶常平倉民賴以安安邱舊有祝靈姬淫祠濟命毀之又嘗汰豪民楊春等獄姦回悉屏迹治聲大著時朝廷遣禮部郎中成導等巡歷青齊舉覈守令以濟治行第一聞於朝遣太府監照磨完者帖木兒齎金帛褒之後遷去士民爲立去思碑於廳事焉

舊志
縣志

青州府志卷三十五

二十三

布延布哈

原作普
顏不花

字希古蒙古氏至正五年由國子生登

右榜進士第一人十八年召授山東宣慰使再轉知樞密院事平章山東行省守禦益都大明兵壓境布延布哈捍城力戰城陷而平章政事巴拜出降布延布哈還告其母曰兒忠孝不能兩全有二弟當爲終養拜母趨官舍坐堂上主將素聞其賢召之再三不往旣而面縛之布延布哈曰我元朝進士官至極品臣各爲其主不屈死之

元史忠
義本傳

于德文順宗時爲山東宣慰司副使明兵取益都城德文

與僉事齊郁皆不屈而死

互見人物傳齊郁
傳又見山東通志

張俊順宗時知山東行樞密院鎮益都明兵攻廣固俊悉

力拒守城破攜妻子投井死

互見人物傳齊郁傳又見山東通志

顏潛顏子四十八世孫順宗時授益都路元帥府宣慰使

子惠保愛民甚戴之

舊志

王玠山西太原人順宗時為壽光尹時歲凶盜起玠乃建

習射亭講武精閱士卒儲糧積芻盜不敢犯民賴以安

山東

通志

右傳舊志有蓋苗馬紹苗山東東路廉訪使紹僉山

東東西道按察司事案廉訪使濟南路置司非益都

專官苗有建言罷益都金礦事紹有益都振饑事入

雜記可也又有安邱教諭張起巖無事可記其博學

青州府志卷三十五

二十四

善篆隸於安邱無涉故遺之